

wšitcy rozumja a powědaju tež serbski. Dzěci němskich staršich rěča a čitaju pak wšě serbski runje tak derje kaž němski: w Ochozskej šuli so mjenujcy kaž na druhich wsach Picańskeje wokoliny z pomocu serbštiny němski wuči, nabožina so serbski wukładuje, a sobotu prěnja rjadownja w serbskej bibliji čita. Do šule, kotraž ma dweju serbskeje wučerjow, khodži ca. 240 dzěci. — Cyrkej je khětro jara stara a drjewjana ze zwonicu město wěže, kiž je so raz wotpaliła. Za to je fara rjana a rumna, w l. 1855 z nowa natwarjena. Farań (hač do 1882 Latk rodź. z Dešanka) předuje jenu njedželu jenož serbski, druhu pak němski a serbski; hdyž pak žani Němcy njepříndu, dyrbi tež tutu druhu njedželu němski kemš wupadnuć, štož so tak rědko njestawa. Tež hdyž je serbska spowědź, njeje žadyn němski kemš. Spěwa so při serbskich Božich službach serbski. Na němske kemšenje je lědma hdy 50 ludži přišlo, mjez tym zo na serbske jich zwjetša 500 khodži (po swědčenju k. fararja). Džiwna naprawa pak knježi we tym, zo so tu pačeŕske dzěci jeno němski rozwučeju, hdyž tola w šuli katechismus a bibiske hrónčka tež serbski wuknu. K. farań mi to z tym wujasni, zo je wón to tak naprawjene přewzał a tuž tež wostajił! — Dokhodow ma farań 2400, 1. wučeř 1200 a 2. wučeř (bjez starobneho přiložka) 420 hr. Patronat słuša kralowskemu konsistorijej.

Mužska a předewšěm tež žónska drasta je tu bóle jednora nježli w Błotach. — Spomnjenja hódny je nałožk, zo dorosčeni mužowje w Božej nocy (hodowničku) na cyrkwinu łubju du a tam jědnaće serbskich kěrlušow wuspěwaju. Hač je hewak hdže tajki abo podobny nałožk, njewěm.

Z Ochozy je něsto wučenych Serbow wušło. Je tam 82-lětny bur Grys, kotrehož pjećo synowje su wšitcy so sami na wučeřstwo přihotowali a z džela dobri a originalni (n. př. Mjertyn Grys w Nowej Wsy) serbscy wučerjo byli. Dale je tam stary džěd Šmjeto, kiž je na duchownistwo studowawši prěnje pruhowanje wobstał, ale zastojnistwa njedostał; tuž pase wón nětko hižo dołhe lěta domach kruwy swojeje narodneje wsy. Před krótkim je so tež khorowatosće dla missionar Kukiš na wotpočink do swojeje Ochozskeje domowiny wrócił.